

“Marcho. L’ultima bandiera” cumò ancje intun satûl cun DVD, Blu Ray e Ultra HD Blu Ray

Dentri a son ancje tancj contignûts extra e un librut in trê lenghis. La presentazion uficiâl, tal bookshop dal Visionario di Udin, si fasarà ai 30 di Mai

“Marcho. L’ultima bandiera” - dopo dal sucès televisîf a nivel talian su Rai Storia e di public, in ocasion des proieziions tai cines dal Friûl – cumò al devente ancje un satûl prezios. La gnove iniziative e sarà presentade vinars ai 30 di Mai, aes 17.30, tal spazi bookshop dal Cine Visionario di Udin, cu la presince di Eros Cisilino e William Cisilino, president e diretôr de ARLeF - Agenzie regionâl pe lenghe furlane, di Claudio Zorzenon, di Arte Video srl, dal regjist Marco Fabbro e dal storic Alberto Travain.

Il docufilm coprodusût de ARLeF e di Arte Video srl, cul contribût de Friuli Venezia Giulia Film Commission e dal Fonds pal audiovisîf dal Friûl-Vignesie Julie, al sarà duncje a disposizion tai formâts DVD, Blu Ray e Ultra HD Blu Ray. Cheste ultime e je une tecnologjie fra lis plui gnovis, buine di sfrutâ al massim lis potenzialitâts dai televisôrs di ultime gjenerazion, no dome tant che cualitât de immagin, ma ancje tant che sun.

“Marcho. L’ultima bandiera” al à vint doi premis internazionâi intai Stâts Unîts, fra chescj il Best Historical Film a New York e une *Special Mention* a San Diego, otignint visibilitât tal circuit IMDb. Un ricognossiment che al contribuîs a infuartî il valôr culturâl e la puartade internazionâl dal projet.

Dentri dal satûl no saran dome i trê supuarts digjitâi cu la version interie dal docufilm (par furlan, talian e, volint, cui sotitui par inglês), ma a saran ancje contignûts extra une vore interessants: fotografiis di backstage, il trailer dal cine e ancje intervistis a Marco Fabbro (regjist), a Eros Cisilino e William Cisilino (president e diretôr de ARLeF), ai atôrs Paolo Mutti (Marc di Murûs) e Aida Talliente (Catarine Arcoloniane, la sô femine) e a Vincenzo Di Francesco (compositôr des musichis origjinâls che a compagnin lis senis).

Al insiore il satûl ancje un librut trilengâl (par furlan, talian e inglês), curât di William Cisilino, che al contestualize in maniere precise dal pont di viste storic la vicende di Marc di Murûs: ultin puartebandiere dal Stât patriarcjâl di Aquilee e figure emblematiche de resistance ae vuere declarade al Friûl de Serenissime Republiche di Vignesie tor il 1420.

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<

Si trate di events restâts platâts par passe cinc secui, tornâts fûr ad implen tal 1986 in graciis de scuvierde di une letare scuindude tra lis pagjinis di un libri de biblioteche de cjase fuartece Brunelde, a Feagne.

Il librut al conte la storie di Marc, zontant approfondiments su la tarde Ete di Mieç furlane, su la fin dal Patriarcjât e su la *damnatio memoriae* imponude de Serenissime. Cun di plui, a son ancje focus dedicâts al Parlament furlan e ae storiche bandiere dal Friûl.

Udin, ai 27 di Mai dal 2025

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / **e-mail: arlef@caltpr.it**

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<

AGENZIE REGIONÂL PE LENGHE FURLANE - AGENZIA REGIONALE PER LA LINGUA FRIULANA - REGIONAL AGENCY FOR FRIULIAN LANGUAGE
Via della Prefettura, 13 - 33100 Udine / Udin Tel. +39 0432 555812 - Fax +39 0432 204158 - e-mail arlef@regione.fvg.it - www.arlef.it